

Kunjungan apostolik Bapa Suci Fransiskus ke Jakarta, Timor Leste, Papua New Guinea dan Singapura, Sept 2-13, 2024

Kesatuan, harapan dan Salib

Umat Katolik di Jakarta merayakan vigil Paskah pada Muc 30 lalu. (Gambar: Media Vatikan)

TAKHTA SUCI: Pejabat Akhbar Takhta Suci mengumumkan pada April 12 lalu bahawa Sri Paus Fransiskus akan melawat tiga negara di Asia dan satu di Oceania pada awal September. Bapa Suci dijadualkan berlepas dari Vatikan pada September 2 dan dijangka kembali ke Roma pada September 13, 2024.

Sri Paus Fransiskus melakukan perjalanan pertama ke Jakarta, ibu negara Indonesia, di mana Bapa Suci akan mendarat pada September 3 hingga 6.

Kemudian, Uskup Roma itu akan terbang ke timur untuk melawat Port Moresby, ibu negara Papua New Guinea dan Vanimo pada September 6-9.

Perhentian seterusnya ialah Dili, ibu negara Timor-Leste, pada September 9-11.

Dari sana, Bapa Suci akan ke Singapura untuk lawatan tiga hari pada September 11-13.

Dua orang kardinal iaitu Kardinal Suharyo dari Keuskupan Agung Jakarta dan Kardinal William Goh dari Keuskupan Agung Singapura memberikan kenyataan sukacita serta harapan mereka dalam menanti kunjungan apostolik Sri Paus Fransiskus.

Komuniti Kristian dan Islam teruja nanti kedatangan Sri Paus Fransiskus

Kardinal Suharyo menyatakan bukan sahaja masyarakat Katolik sangat bersemangat untuk menerima kunjungan Sri Paus Fransiskus tetapi Imam Besar Masjid Negara Istiqlal adalah antara mereka yang pertama mengumumkan lawatan kedatangan Sri Paus Fransiskus ke Indonesia, beberapa minggu sebelum pengumuman rasmi Vatikan.

Prelatus itu yang ditemubual oleh *media Vatikan* mengatakan kehadiran fizikal Sri Paus Fransiskus adalah sangat penting dalam meneguhkan iman Katolik komuniti Kristian di Indonesia dan mengajak umat agar mendalami pengetahuan tentang ajaran-ajaran Sri Paus Fransiskus melalui surat-surat Ensikliknya seperti *Evangelii Gaudium*, *Laudato*

Si' dan *Fratelli Tutti*.

Suharyo berkata dua pesan penting Sri Paus sangat berkait rapat dalam konteks Indonesia ialah mengenai tanggungjawab manusia untuk melindungi alam sekitar dalam ensiklik *Laudato Si'* dan tentang kepentingan mengekalkan persaudaraan seperti yang dinyatakan dalam *Fratelli tutti* lebih-lebih lagi Indonesia merupakan negara berpenduduk penganut Islam yang teramai di dunia.

Kardinal Suharyo Hardjoatmodjo yang juga adalah Uskup Agung Jakarta dan presiden Konferensi para Uskup Katolik Indonesia, turut menyatakan kepentingan membina toleransi agama, keamanan, dan perpaduan — khususnya dalam kalangan penganut Kristian dan Islam di Indonesia.

“Masjid negara, yang dipanggil *Istiqlal*, bermaksud kebebasan, terletak betul-betul di hadapan katedral Katolik di Jakarta. Masjid negara ini sengaja dibina di tapak ini sebagai simbol keharmonian.”

Kardinal itu percaya lawatan Sri Paus Fransiskus ke Indonesia akan membawa “pesan keamanan, keadilan sosial, kebebasan beragama dan menjadi kunci dalam mengukuhkan hubungan dan dialog antara Katolik dan Islam.

Uskup Petrus Canisius Mandagi dari Merauke, Papua Selatan berkata, “Semoga dengan kunjungan Sri Paus ke empat negara ini, umat Katolik tempatan akan lebih berani menyuarakan kebenaran serta menjadi teladan bagi penganut agama lain, saling berdialog dan menerima perbezaan seperti yang sentiasa ditekankan oleh Bapa Suci Fransiskus,” katanya kepada media Vatikan.

Sri Paus Fransiskus akan menjadi Bapa Suci ketiga yang mengunjungi Indonesia. Dua Sri Paus sebelumnya adalah Sri Paus Paulus VI (Disember 3, 1970) dan Sri Paus Santo Yohanes Paulus II (Oktober 8-12, 1989).

Ini adalah kunjungan yang bakal mencatat satu lagi sejarah penting mengenang hubungan kedua-dua negara yang terjalin sudah panjang. Indonesia dan Takhta Suci sudah menjalin hubungan sejak tahun 1947.

Kedatangan Sri Paus Fransiskus ke Singapura akan perbaharui iman warga Katolik tempatan

Untuk membantu umat Katolik Singapura untuk mem-

persiapkan rohani “untuk bertemu Yesus melalui lawatan pastoral Sri Paus Fransiskus, Keuskupan Agung Singapura telah melancarkan laman web khusus yang mengandungi doa, sumber dalam talian dan maklumat terkini kedatangan Bapa Suci ke republik tersebut pada bulan September.

Laman web itu juga memperkenalkan tema pilihan keuskupan agung iaitu “Perpaduan, Harapan dan Salib” sebagai meraikan peristiwa perjalanan apostolik Bapa Suci 2024.

Kardinal Goh menggalakkan warga Katolik Singapura untuk bersatu dan berdoa dalam menanti lawatan Bapa Suci pada bulan September ini.

“Marilah kita, sebagai sebuah komuniti, berdoa untuk kesihatan dan keselamatan Bapa Suci dan meminta Tuhan untuk memberikan kita lawatan yang benar-benar bermakna dan penuh rahmat,” katanya.

Goh menyatakan bahawa Gereja di Singapura kelihatan bersemangat kerana “begitu banyak Misa, pembaptisan dan Krisma” tetapi ia tetap menghadapi cabaran, termasuk amalan kepercayaan yang merosot di kalangan rakyat Singapura tempatan.

“Hanya separuh daripada penganut Katolik datang ke Gereja. Terima kasih kepada migran yang memenuhi Gereja di sini,” katanya. Sehingga kini, terdapat kira-kira 395,000 penganut Katolik yang tinggal di republik itu yang terdiri daripada pelbagai latar belakang etnik dan budaya.

Misa Kudus di sini kebanyakannya dirayakan dalam bahasa Inggeris tetapi juga turut menyediakan bahasa Mandarin, Tamil dan bahasa Asia Tenggara atau Eropah yang lain untuk komuniti tempatan dan ekspatriat.

Gereja Katolik di Singapura agak muda, oleh itu, Kardinal Goh berharap lawatan Sri Paus Fransiskus akan merangsang pembaharuan dan pengukuhan iman, pertobatan dan semangat menyebarkan Khabar Gembira di kalangan komuniti Katolik Singapura.

Kali terakhir dan satu-satunya kunjungan Sri Paus ke Singapura ialah pada 1986 apabila Sri Paus Santo Paulus II singgah lima jam di negara itu dan merayakan Misa bersama ribuan orang di stadium nasional. — *CNA/media Vatikan*

Bagaimana menyembuhkan luka batin, kebencian?

Seorang pelajar bertanya kepada saya bagaimana mengampuni setelah mengalami luka batin yang cukup mendalam bahkan menyimpan kebencian dan trauma. Apa yang seharusnya dia lakukan supaya ada kedamaian dan ketenangan di hati?

Untuk menyembuhkan luka batin mendalam, kita dapat meminta bantuan Tuhan, namun Tuhan menantikan keterbukaan kita pada-Nya.

Proses penyembuhan memang lama dan paling utama, kita harus bersabar untuk berpasrah.

Bergantung berapa dalam luka batin itu. Semakin dalam, tentu semakin memerlukan kesetiaan.

Luka batin tertentu memerlukan penyembuhan yang lebih menyeluruh, bukan hanya fikiran, tetapi juga hati.

Kadang-kadang secara intelektual, kita sudah ingin mengampuni, tetapi perasaan hati kita belum bersedia, belum aman di mana rasa sakit dan benci tiba-tiba muncul lagi.

Bahkan orang yang berfikir sudah sembuh, tiba-tiba bergelojak lagi bila bertemu atau mengalami pengalaman yang menyakitkan hati.

Jadi nyatalah bahawa penyembuhan memerlukan proses yang lebih panjang dan kompleks.

Kitab Suci sendiri banyak berkisah tentang pengalaman luka dan bagaimana orang dapat sembuh ketika memandang hidup dari kacamata Tuhan. Misalnya kisah Yosef, yang dijual oleh saudara-saudaranya ke pedagang hamba.



Luka batin dan kemarahan yang lama terpendam tidak mudah disembuhkan tetapi ia tidak mustahil untuk sembuh dengan bantuan kuasa Tuhan.

Hidupnya merana, namun tangan Tuhan sentiasa menyertainya sehingga dia dapat menjadi bendahara Kerajaan Mesir.

Pedih sekali pengalaman Yosef, lebih-lagi ketika melihat saudara-saudaranya datang kepadanya untuk membeli gandum, semasa bencana kelaparan melanda.

Yosef bergantung pada Tuhan dalam deritanya, dan percaya bahawa Tuhan memelihara hidupnya selama ini.

Dia mendapati bahawa Tuhan mempunyai rencana yang lebih besar, yang melampaui peristiwa yang menyakitkan hatinya.

Dengan menyatukan diri dengan kasih Tuhan, dia semakin dapat disembuhkan dan dapat mengampuni saudara-saudaranya dengan ikhlas.

Berikutnya Daud. Pengalaman kelukaannya banyak digambarkan dalam Mazmur: "Tuhan itu dekat kepada orang-orang yang patah hati, dan Dia menyelamatkan orang-orang yang remuk jiwanya" (Mzm. 34:19).

Bukan hanya dekat, tetapi Tuhan juga menyelamatkan. "Dia menyembuhkan orang-orang yang patah hati dan membalut luka-luka mereka" (Mzm. 147:3).

Daud juga hampir membalas dendam kesumatnya, namun niat itu dihakisnya kerana melihat hidupnya dari kacamata Tuhan.

Dalam pengalamannya, Daud terluka oleh Saul, raja yang pernah diabdinya dulu, tetapi kemudiannya berusaha membunuhnya.

Dalam pada itu, Daud juga pernah

terluka kerana dosanya sendiri. Dia memperisterikan Batseba, isteri kepada Uria yang dibunuh oleh Daud. Luka kerana dosa membuatkan Daud hancur. Tetapi Daud bertobat, memohon keampunan dan keterbukaan hatinya menyebabkan dia mengalami penyembuhan Tuhan.

Akhirnya kita harus lihat Yesus sendiri, yang menawarkan penyembuhan dari hati-Nya.

"Marilah kepada-Ku, semua yang letih lesu dan berbeban berat, Aku akan memberi kelegaan kepadamu," (Mat. 11:28). Yesus-lah penyembuh sejati.

Di kayu salib Dia dilukai secara amat mengerikan, tetapi Dia dapat melampaui semuanya itu dan mengalirkan rahmat pengampunan.

Jadi bagaimana agar kita dapat sembuh dari luka, trauma dan kebencian?

Kita harus pertama-tama percaya kepada Tuhan melalui Yesus. Datanglah kepada-Nya. Bukalah hati kita yang sakit di depan salib, dan sadarilah bahawa anda terlebih dahulu dikasihi oleh Yesus.

Ingatlah bahawa Yesus mengundang kita datang. Dia juga yang mencari orang yang sakit dan hilang. Dia memahami dan merangkul setiap hati yang patah ini dengan kasih-Nya. Lakukan banyak latihan rohani dalam meditasi di depan salib.

Sambil membayangkan gerakan Yesus yang penuh kasih, kita menimba kekuatan dari Dia. Dengan merasakan rangkulan kasih-Ny, dari sanalah perlahan-lahan mengalir aliran air hidup, yang memimpin kita pada pengampunan sejati. — *Fr Gregorius Hertanto, hidupkatolik.com*

Bersatu pada pokok anggur sejati dan menghasilkan buah-buah kebaikan

Dalam Perjanjian Lama hubungan antara kaum Israel dan Yahweh (Tuhan) digambarkan sebagai pohon anggur.

Misalnya Yesaya (Yes 5:1) menulis: "Kebun anggur Tuhan semesta alam ialah kamu Israel, dan orang Yehuda ialah tanam-tanaman kegemaran-Nya" (ay.7).

Yeremia juga memberi gambaran tentang pohon anggur sejati, "Aku telah membuat engkau tumbuh sebagai pokok anggur pilihan, sebagai benih yang sungguh murni" (Yer 2:21).

Dengan demikian, anggur dipandang sebagai lambang bangsa Israel. Harus diperhatikan lambang pokok anggur itu dikaitkan tentang wujudnya ketidakaslian bangsa Israel.

Dalam hal ini, Yesaya melihat Israel menjadi sebagai kebun anggur yang tumbuh dan berkembang liar.

Yeremia mengeluh, bahawa bangsanya dianggapnya merosot menjadi pokok anggur yang palsu!

Dengan latar belakang itulah dalam Injil Yohanes Yesus berkata: "Akulah pokok anggur yang benar" (Yoh 15:1).

Pokok anggur harus benar, tulen, sejati atau seperti seharusnya. Yesus mahu menyedarkan orang-orang Yahudi akan situasi dan keadaan mereka yang sebenarnya.

Mereka itu, terutama kaum Farisi,

menganggap diri mereka sebagai ranting-ranting pokok anggur yang asli atau benar. Tetapi seperti dikatakan oleh para nabi, moral serta iman orang-orang Farisi itu sudah merosot kualitasnya.

Dalam hal ini, Yesus menegaskan: "Akulah pokok anggur yang benar!" Yesus mahu menegaskan: "Jikalau kamu menganggap dirimu orang Yahudi (Israel), bukanlah itu berarti bahawa kamu akan dengan sendirinya diselamatkan!"

Yesus berkata, "Satu-satunya jalan yang dapat menyelamatkan kamu ialah, kamu harus selalu memiliki hubungan erat dalam hidupmu dengan Aku. Sebab Aku ini adalah anggur Tuhan dan kamu adalah ranting-rantingnya yang bersatu dengan Aku".

Bukan atas dasar keturunan atau darahnya sebagai orang Yahudi, melainkan hanya dengan memiliki iman dan kepercayaan kepada Yesus kita akan menjadi ranting-ranting yang selalu bersatu dengan Tuhan.

Bagi kita yang hidup pada zaman sekarang, kita harus mengingati bahawa bukan sarana, alat-alat atau syarat-syarat lahiriah atau jasmaniah yang dapat menjamin hubungan manusia dengan Tuhan.

Yang diperlukan ialah hubungan persatuan dan kasih rohani yang mendalam dengan Yesus Kristus. Hanya itulah yang

merupakan jaminan hubungan dengan Tuhan yang benar dan pasti.

Persatuan Yesus dengan para pengikut-Nya adalah mutlak agar kita dapat menjadi ranting yang tidak mudah layu serta menghasilkan buah.

Menjadi umat Paskah bererti menjadi manusia yang tidak terpisah dan selalu bersatu erat dengan sang pokok anggur sejati iaitu Yesus sendiri.

"Tinggal dalam Kristus" – itulah antara pesan Injil Yohanes kepada kita! Apa artinya: tinggal dalam Kristus?

Dengan tinggal selalu dalam Kristus atau menjadi ranting yang melekat kuat pada pohon anggur iaitu Yesus, maka kita akan menghasilkan buah-buah kebaikan, buah-buah yang menggembirakan, yang menyegarkan dan bukan buah-buah asam, bukan buah-buah kekacauan, permusuhan.

Ranting, selain harus bersatu pada pokoknya, ranting itu harus selalu bersih dan dibersihkan.

Ini bererti, sebagai ranting, kita harus membiarkan diri disucikan melalui pertobatan, mengaku dosa, doa dan mati raga, agar rahmat dan berkat Tuhan mengalir dan tercurah bagi kita tanpa halangan, dan memberi hidup serta pada akhirnya menghasilkan buah-buah kebaikan seperti: kasih, pengampunan, keadilan, persaudaraan dan

HARI MINGGU PASKAH V (TAHUN B)

**Kisah Para Rasul 9:26-31;
1 Yohanes 3:18-24;
Injil Yohanes 15:1-8.**

sebagainya.

Kesetiaan pada sang pokok anggur sejati juga harus terus dibangun dan diperbaharui.

Kesetiaan adalah tanda kita tinggal dalam Dia dan Dia dalam kita. Kesetiaan kita dalam panggilan, dalam tugas dan pelayanan adalah tanda persatuan dan kesatuan kita pada Dia sang pokok anggur sejati.

Jangan biarkan diri menjadi kering, terlepas atau mati dari pokok. Ramai di antara kita yang berandal pada kekuatan diri sendiri sehingga lupa kepada Sumber hidup kita.

Semakin kita merasa tak berdaya, kembalilah kepada Tuhan kerana rahmat serta pertolongan-Nya sentiasa memampukan kita.

Sesungguhnya untuk terus 'melekat' dengan Kristus bukanlah terjadi secara automatik, melainkan merupakan suatu penghayatan, usaha berterusan, menerima sakramen-sakramen dan doa sungguh-sungguh. — *Fr Fransiskus Emanuel da Santo, Mirifica*



KENINGAU: “Apabila anda berada di tengah-tengah umat, jadi-lah cerminan wajah dan terang Kristus,” pesan Fr Appolonius Yakis, paderi pembantu paroki Katedral St Francis Xavier (KSFX) semasa menyampaikan homili dalam Misa Kudus sempena pertemuan Komite Katekis KSFX (KOMKAT KSFX).

Agar para katekis teguh dalam menghadapi cabaran pelayanan, Fr Appolonius mengatakan, “Yesus menunjukkan cintakasih-Nya melalui pengorbanan, maka cabaran seperti tiada kenderaan, kesihatan tidak menentu harus ditempuhi dengan penuh sabar.”

Fr Appolonius yang baharu menyambut ulang tahun pertama imamatnya baru-baru ini turut berpesan agar para katekis meluangkan masa dengan keluarga dan memiliki kerohanian yang utuh.

Pertemuan Katekis itu diadakan di Gereja Maria Rani Tobitua, Kg Linsudan pada April 10 yang lalu.

Menyadari peranan para katekis dalam membantu para paderi untuk menyebarkan iman (*KHK, 1983 kan. 773*), empat paderi dari paroki KSFX datang untuk memberi

sokongan.

Para paderi tersebut ialah Msgr Gilbert Lasius, Fr Appolonius Yakis yang juga pembimbing rohani bagi Komite Katekis KSFX, paderi yang baharu ditahbis pada April 7 lalu iaitu Fr Kennedy Nakudah dan Fr Bede Anthonius.

Pertemuan tersebut dimulakan dengan mesyuarat. Msgr Gilbert Lasius menyarankan beberapa perkara kepada komite Katekis agar pertemuan itu melibatkan Komite Liturgi dan pengerusi-pengerusi Komuniti Umat Katolik (KUK) bagi kelancaran perjalanan liturgi.

Msgr Lasius juga berpesan agar para katekis sentiasa memastikan altar dan tabernakel dalam keadaan bersih dan kemas. “Pastikan tabernakel itu mempunyai Hosti Kudus, jangan sampai para paderi memberi tunduk hormat kepada tabernakel tetapi kosong!”

Pengerusi KOMKAT KSFX, Katekis Victor Saidi mengucapkan terima kasih kepada pengerusi KUK Gereja Maria Rani Tobitua dan umat yang menerima kehadiran KOMKAT untuk mengadakan pertemuan — *Juanis bin Marcus*

Pembaptisan: Kematian terhadap dosa, kebangkitan bersama Kristus dalam hidup baharu

KUALA PENYU: Sto Siprianus (250) menegaskan bahawa “Pembaptisan yang menghapuskan dosa asal adalah tidak boleh ditunda.” (*Cyprian, Epistles 64*).

Pada April 14 lalu, seramai 53 orang bayi dan kanak-kanak berumur tujuh tahun ke bawah telah dibaptis dalam upacara pembaptisan yang disempurnakan oleh Fr Paul Mikin di Gereja St Peter Bundu selepas Misa Kudus Minggu Paskah ke tiga.

Dalam homili singkatnya, Fr

Paul Mikin menyatakan betapa pentingnya kita dan setiap anak yang dilahirkan dalam keluarga Katolik menerima pembaptisan agar anak-anak tersebut boleh menerima rahmat Tuhan dan dosa asal mereka disucikan.

Sehari sebelum upacara pembaptisan, para ibu bapa bersama penanggung telah mengikuti rekoleksi yang dikendalikan oleh Komite Kerasulan Hidup Keluarga Kristian (KKHKK) yang dipengerusikan oleh Sdra Fred Ju-

din Tangulon. Dua orang penceramah iaitu Sdra Jeffery Singli selaku Pengerusi Majlis Pastoral Paroki St Peter dan Katekis Christopher Mugin.

Dalam rekoleksi itu, ibu bapa dan penanggung diberi penjelasan tentang Sakramen Pembaptisan dan peranan mereka sebagai pendidik utama dalam hal iman kepada anak-anak. Ibu bapa dan wali baptis juga diseru untuk mempraktikkan iman dan berusaha hidup kudus. — *Marcus Angang*



Fr Paul Mikin sedang membaptis salah seorang bayi di Gereja St Peter, Kuala Penyu.

Tanya Jawab



Adakah anda mempunyai persoalan agama, Kitab Suci atau ajaran Gereja? Hantarkan soalan anda ke:

HERALD
5, Jalan Robertson,
50150 Kuala Lumpur
Tel: 03-2026 8291
Email:
liza@herald.com.my

Cincin perkahwinan

Soalan: Dalam persiapan menerima Sakramen Perkahwinan, saya ingin bertanya, adakah peraturan khusus dalam Gereja Katolik yang menentukan bahawa bahan cincin yang akan dipakai oleh mempelai semasa upacara perkahwinan harus dibuat daripada emas? — *Erik Taipan*

Jawaban: Cincin sehingga ke hari ini masih dianggap sebagai simbol orang yang berkahwin atau tanda bahawa seseorang sudah “terikat” dalam perkahwinan.

Pada umumnya orang yang berkahwin memakai cincin di jari manis tangan kanan, sama ada suami mahupun isteri.

Perkahwinan tanpa cincin rasanya kurang lengkap. Tetapi, apakah sesungguhnya erti dan nilai sebuah cincin kahwin?

Cincin kahwin sudah diamalkan sejak zaman dahulu, mungkin sekitar kekaisaran Roma bahkan lebih lama dari itu.

Masyarakat sudah lama menggunakan cincin sebagai lambang persatuan, kepemilikan, kesetiaan, kekayaan dan hadiah. Cincin kahwin sudah menjadi tradisi yang mendunia untuk banyak budaya.

Dalam budaya atau tradisi Katolik, cincin kahwin juga dipakai dalam tata perayaan perkahwinan sama ada sakramen mahupun bukan sakramen.

Bahkan dalam liturginya pun, ada rumusan

yang dengan jelas menyatakan berkat atas cincin sebelum masing-masing dikenakan oleh kedua-dua mempelai yang baharu saja mengikrarkan janji.

Rumusan yang biasanya adalah seperti berikut: “Kenakanlah cincin ini pada jari manis tangan kiri suami/isterimu sebagai tanda cinta dan kesetiaanmu.”

Lalu salah satu pihak secara bergantian akan melanjutkan dengan rumusan yang sama, “Terimalah cincin ini sebagai lambang cinta dan kesetiaanku kepadamu.”

Dari pernyataan ini, dapat diketahui bahawa cincin diberikan sesudah kedua mempelai mengikrarkan janji.

Semoga Sdra Eric sentiasa mengingati bahawa setiap upacara perkahwinan, yang terpenting adalah pengikraran janji, bukan simbol-simbol pendukungnya misalnya cincin atau bunga pengantin.

Lafaz janji inilah yang menentukan sah atau tidak sebuah perkahwinan. Faktor pendukung atau yang membantu mengindahkan upacara itu, misalnya cincin, gaun pengantin dan sebagainya adalah sesuatu yang sekunder, yang boleh ada dan boleh juga tidak.

Tidak ada keharusan untuk memakai cincin perkahwinan sesudah janji diikrarkan oleh kedua-dua mempelai.

Dengan pernyataan ini, maka keberadaan cincin bukanlah yang menentukan sahnya suatu perkahwinan Katolik, melainkan suatu simbol

yang ditambah oleh tradisi sebagai tanda ikatan, cinta yang tak putus, kemurnian, dan kesetiaan.

Oleh itu, sama ada cincin itu diperbuat daripada emas atau bukan, bukanlah sesuatu yang wajib atau relatif.

Soalan II: Apakah perkahwinan Katolik harus dilakukan dalam Gereja sahaja?

Jawaban: Pada dasarnya, Gereja Katolik memandang bahawa perkahwinan merupakan peristiwa yang kudus kerana seorang lelaki dan wanita disatukan dalam suatu perayaan liturgi.

Meskipun begitu, perkahwinan boleh dilakukan di luar Gereja jikalau ada alasan yang kuat, seperti perkahwinan antara orang yang dibaptis dengan pasangan yang tidak dibaptis dalam Gereja Katolik (*Kan. 1118§2*).

Namun biasanya, paderi paroki pada umumnya mengupayakan pasangan meskipun berbeza agama berkahwin di Gereja kerana Gereja adalah tempat yang sesuai dan sebagai tempat yang “diperuntukkan bagi ibadat ilahi di mana kaum beriman berhak untuk masuk melaksanakan ibadat ilahi, terutama ibadat yang dilangsungkan secara publik” (*Kan. 1214*).

Dan lebih dari itu, bagi Gereja Katolik, perkahwinan antara lelaki dan wanita memiliki nilai yang penting pada saat liturginya bukan pada alat-alat bantu dalam memeriahkan perayaan. — *hidupkatolik*



Sahabat kecil Yesus

Cari perkataan tersembunyi



K Y E R U S A L E M
 M T R A S U L Q C U
 O U B A R N A B A S
 J S A U L U S M O I D
 R W Y U N A N I B M

Yunani
 Saulus
 Barnabas
 Yerusalem
 Rasul



Bantu kanak-kanak ini untuk mencari basikalnya yang hilang.

Mari Mewarna



Tinggallah di dalam Aku dan Aku di dalam kamu. Sama seperti ranting tidak dapat berbuah dari dirinya sendiri, kalau ia tidak tinggal pada pokok anggur, demikian juga kamu tidak berbuah, jikalau kamu tidak tinggal di dalam Aku (Yohanes 15: 4)

Lengkapkan wajah orang pada gambar ini dan warnakan.



AKULAH POKOK ANGGUR YANG BENAR DAN BAPA-KULAH PENGUSAHANYA. (YOH 15: 1)



Hello adik-adik,
 Apa khabar? Injil pada hari minggu ini menggambarkan peribadi Yesus sebagai pokok anggur yang benar. Yesus adalah pokok anggur sejati dan kita adalah ranting atau cabang-cabang-Nya. Ini bermak-

sud Kristus adalah sumber kehidupan sejati dan setiap orang yang datang kepada Kristus akan memperoleh berkat yang tidak pernah berakhir. Tinggal di dalam Kristus dapat menciptakan kebaikan bagi diri kita sendiri.

Bagi kita yang telah menerima kasih Tuhan akan belajar dari cara Tuhan berbuat kasih dan melakukan kasih yang sama kepada orang-orang di sekeliling kita. Adik-adik, sebagai 'ranting' kita diharapkan untuk menghasilkan buah iaitu buah-buah cinta,

kegembiraan, kebaikan, belas kasihan, kebaikan, kelembutan dan kesabaran. Oleh itu adik-adik, jadilah ranting yang sentiasa 'melekat' pada pokoknya iaitu Yesus.
 Salam Sayang
 Antie Melly

BELIA MILENIUM

Perkongsian para baptisan baharu 2024

Gereja Katolik adalah sakramen keselamatan

Saya mahu menjadi pengikut Yesus kerana saya mempunyai kerinduan dan keinginan untuk menerima Tubuh dan Darah Kristus dalam perayaan Ekaristi, serta ingin memperoleh keselamatan dan kehidupan kekal.

Semasa mengikuti Inisiasi Kristian

Dewasa, saya mulai sedar akan pentingnya sentiasa mendengar firman Tuhan, dan menerima teguran-teguran melalui firman Tuhan itu. Oleh itu, saya mulai berusaha untuk berdoa, membaca Injil dan menghadiri Misa Kudus.

Sebelum mengenal Yesus, rutin harian saya hanya berpusatkan kesibukan dunia. Apabila saya mulai mengikuti kelas IKD dan mengenal Yesus, saya dapat merasai



suatu ketenangan jiwa yang tidak dapat diberikan oleh dunia ini.

Saya juga merasa semakin dekat dengan Tuhan Yesus Kristus. Dan selepas saya mengikuti kelas IKD ini juga, ada ahli keluarga yang beragama Katolik yang sebelum ini selalunya mengisi

masa pada hujung minggu dengan aktiviti duniawi juga mulai tekun berdoa dan menghadiri Misa Kudus.

Selepas dibaptis, saya berusaha memperkenalkan Kristus kepada mereka yang belum mengenal Dia, belajar merendahkan diri, mengasihi sesama kita dan hidup menurut Roh Kudus. — **Charlee Yong Chew Chi, Katedral St Francis Keningau**

Yesus tidak memberikan 'kecelakaan' tetapi damai

Pada dasarnya saya ingin menjadi seorang Katolik kerana saya tertanya-tanya benarkah agama Katolik ini dapat menawarkan saya ketenangan, kedamaian dan kasih.

Sebelum saya mendaftarkan diri untuk menyertai Inisiasi Kristian Remaja (IKD), saya memiliki banyak masalah, salah satunya adalah perasaan takut.

Saya sentiasa gelisah dan takut akan apa yang akan terjadi pada hari esok. Saya tidak tahu mengapa saya berasa takut akan perkara yang tidak pasti.

Saya juga memiliki satu masalah besar dalam diri saya iaitu saya memiliki suara hati yang mengawal diri saya. Kisah ini bermula apabila saya berumur tujuh tahun di mana ketika itu, saya ada dorongan kuat untuk mengejek orang kurang upaya.

Ada dua suara di dalam diri saya yang menegur saya bahawa perbuatan saya salah dan satu



suara lagi menggalakkan saya untuk terus mengejek orang lain.

Meskipun saya cuba mengawalinya, tetapi seringkali gagal. Mujurlah, setelah mengenal Yesus yang Maha Baik dan Pengasih dan dengan memohon bantuan-Nya, saya sembuh dari suara yang tidak baik itu. Sesungguhnya, Yesus adalah Sang Juruselamat kita! — **Danny Rayner Thien, Keningau**

Rencana Tuhan selalu baik

CHERAS: Demikianlah firman TUHAN, iaitu rancangan damai sejahtera dan bukan rancangan kecelakaan, untuk memberikan kepadamu masa depan yang penuh harapan. (Yeremia 29:11), merupakan tema bagi sebuah program belia - *Love & Life Kick-Start 2024* yang diadakan di Gereja St Francis of Assisi baru-baru ini.

Program tersebut mendalami aspek identiti dan hubungan dengan Tuhan dan orang lain.

Ia merangkumi topik seperti mengenali diri sendiri, makna Misa Kudus, hubungan dengan orang lain, Gereja dan dunia.

Para peserta juga terlibat dalam pelbagai bentuk doa seperti doa Taizé, doa kontemplatif, pujian dan penyembahan serta Ibadat Jalan Salib.

Kehadiran Uskup Agung Kuala Lumpur, Uskup Julian Leow telah memeriahkan



ASAYOKL

program ini di mana prelatus itu berbicara tentang Gereja sebagai 'Rumah'.

Dalam program ini juga para peserta berpeluang untuk bersoal jawab tentang panggilan dan mendoakan para paderi serta uskup.

Salah seorang peserta, Natalia Hiew dari Gereja St Ignatius mengongsikan, "Rasa

ingin tahu mendorong saya untuk menyertai program ini."

"Pada mulanya, saya berasa gugup tetapi sepanjang program ini berlangsung, saya merasakan kehadiran Tuhan yang kuat dan saya didorong untuk tabah, mengenal peribadi dan diri sendiri," kata Natalia.

Kristus adalah penentu dalam kehidupan manusia

KOTA VATICAN: "Hari ini, kita berterima kasih kepada Tuhan atas inspirasi hebat Sto Yohanes Paulus II kerana mengadakan Hari Belia Sedunia (WYD) pertama, 40 tahun lalu," kata Kardinal José Tolentino de Mendonça, Ketua Dikeasteri untuk Kebudayaan dan Pendidikan pada April 14 lalu sempena ulang tahun ke-40 WYD di Dataran Sto Petrus.

Prelatus itu menekankan ba-

hawa WYD telah menghasilkan banyak "buah harapan, cinta, kebangkitan semangat dan panggilan" yang membuktikan bahawa WYD adalah program unggul dan tidak boleh dihilangkan dalam takwim Gereja.

Katanya, melalui WYD, Yesus mengajak kaum muda untuk "Datang, lihat, sentuh, makan."

"Kristus adalah penentu dalam kehidupan manusia. Kepentingan Kristus bukanlah kebenaran teori

yang abstrak; tetapi ia adalah kebenaran yang telah kita sentuh, lihat dan rasa!"

Kardinal itu juga mengatakan, "WYD juga telah mengubah banyak kehidupan belia, mencipta kisah yang hebat, dan terus mengubah hidup kita, kisah kita".

"Kristus tidak mahu kita menjadi penonton. Kristus mahu kita menjadi saksi yang berkata, 'Saya telah melihat dengan mata saya, saya telah mendengar dengan telinga saya, saya telah menyentuh.' Ini menjadikan kita sebuah Gereja misionari, sebuah Gereja yang keluar untuk bertemu, menyentuh, berdialog dengan orang lain!"

"Sri Paus Fransiskus juga pernah mengatakan kepada para belia, "jangan menjadi kaum muda 'penonton' dan menyaksikan dengan pasif sejarah berlalu. Tetapi jadilah si tukang 'bising', bukan bermulut bising sebaliknya menjadi pewarta Khabar Gembira!"

WYD seterusnya akan berlangsung di Seoul, Korea Selatan pada 2027. — *media Vatikan*



Belia orang asli sebagai penjaga budaya

NEW YORK: Uskup Agung Caccia, Pemerhati Tetap Takhta Suci kepada PBB, telah menyampaikan ucapan pada Sesi ke-23 Forum Tetap PBB mengenai Isu Orang Asli di New York, April 16 lalu.

Pertemuan bertema, “Meningkatkan Hak Orang Asli untuk Penentuan Nasib Sendiri dalam Konteks Deklarasi PBB mengenai Hak Orang Asli: Menekankan Suara Belia Orang Asli”

Dalam kenyataannya, Uskup Agung menyatakan bahawa Takhta Suci mengiktiraf kerjasama Forum Tetap Isu Orang Asli.

Prelatus itu menegaskan tentang Deklarasi Pertubuhan Bangsa-Bangsa Bersatu mengenai Hak

Orang Asal (UNDRIP) serta menekankan kepentingan mengiktiraf “peranan belia orang asli sebagai penjaga budaya mereka sekarang dan masa depan.”

Uskup Agung Caccia menjelaskan bahawa Sri Paus Fransiskus telah menggalakkan golongan muda orang asli untuk mengekalkan budaya mereka dengan memerangi penyisihan, pembaziran dan kemiskinan demi membina dunia yang lebih adil dan berperikemanusiaan.

Prelatus itu juga berbicara mengenai sumbangan belia orang asli dalam bidang kebudayaan.

“Mereka boleh melibatkan diri secara aktif dalam melindungi dan menghidupkan semula amalan bu-

daya mereka serta menyumbang kepada pemeliharaan cara hidup masyarakat mereka yang berbeza, melindungi hak mereka demi kelangsungan budaya serta kehidupan mereka,” katanya.

Belia orang asli berfungsi sebagai “jambatan antara generasi, memupuk dialog, persefahaman, dan kerjasama antara generasi dalam komuniti mereka,” tambah Uskup Agung.

Mereka juga berada di barisan hadapan dalam memperjuangkan perlindungan tanah nenek moyang, sumber asli dan ekosistem, yang merupakan komponen utama identiti orang asli.

Diplomat Vatikan itu memetik kata-kata daripada Sri Paus



Bapa Suci bertemu dengan perwakilan belia orang asli di Vatikan pada Mei 30, 2018.

Fransiskus yang menegaskan bahawa “Tuhan, Pencipta dan Bapa semua orang dan segala yang ada, memanggil kita hari ini untuk hidup dan menjadi saksi kepada panggilan kita untuk mewujudkan

persaudaraan sejagat, kebebasan, keadilan, dialog, perjumpaan, cinta dan kedamaian demi mengelak daripada tercetusnya kebencian, perpecahan, keganasan dan peperangan.” — *media Vatikan*

Doa, adorasi lawan individualisme



Sri Paus Fransiskus bertemu dengan anggota Yayasan Kepausan di Clementine Hall. Gambar: Media Vatikan.

ROMA: Meningkatnya budaya ketidakpedulian dan individualisme” pada hari ini harus dilawan dengan doa dan adorasi, yang menginspirasi solidariti dengan mereka yang memerlukan, kata Sri Paus Fransiskus.

Usaha amal oleh iman Katolik “harus terus dipupuk melalui partisipasi dalam kehidupan Gereja, menerima sakramen-sakramen dan menggunakan waktu dengan tenang di hadapan Tuhan, dalam doa dan adorasi,” kata Bapa Suci Fransiskus kepada lebih 60 anggota Yayasan Kepausan dan keluarga mereka pada April 12.

Yayasan Kepausan dari Amerika Syarikat itu merupakan organisasi amal di Amerika yang berdedikasi untuk memenuhi permintaan Sri Paus untuk keperluan

Gereja Katolik. Para penyumbang bagi yayasan tersebut, yang dikenali sebagai Pengurus Santo Petrus, melakukan ziarah tahunan ke Roma dan berkesempatan bertemu dengan Bapa Suci.

Sri Paus Fransiskus juga mengingatkan mereka bahawa ziarah tahun ini berlangsung pada Tahun Doa sebagai persiapan menyambut Tahun Suci 2025.

Prelatus itu turut mendorong mereka untuk “tidak lupa menyembah Tuhan” dalam adorasi. “Kita telah mengabaikan bentuk doa ini dan kita perlu mengembalikan praktik ini.”

“Melalui ketekunan kita dalam berdoa, secara bertahap kita akan menjadi ‘satu hati dan jiwa’ dengan Yesus dan orang lain, yang kemudian dapat diterjemahkan se-

bagai solidariti dan berbahagi makanan sehari-hari,” katanya yang merujuk kepada petikan dalam Kisah Para Rasul.

Sangti Papa menjelaskan meskipun para penderma mungkin secara peribadi tidak pernah bertemu dengan penerima derma mereka, “program-program Yayasan Kepausan memupuk ikatan spiritual dan persaudaraan dengan orang-orang dari pelbagai budaya, bahasa dan wilayah yang berbeza yang menerima bantuan.”

Sri Paus Fransiskus juga berterima kasih kepada yayasan tersebut kerana telah membantu penerus Santo Petrus “membangun banyak Gereja tempatan dan peduli terhadap sejumlah besar orang yang kurang beruntung.” — *media Vatikan*

Umat Katolik Eropah bantah rencana legalisasi pengguguran bayi

WARSAW: Puluhan ribu rakyat Poland menyertai protes jalanan yang disokong Gereja selepas pengubal undang-undang meneruskan rancangan untuk meliberalisasikan pengguguran janin di negara tradisi Katolik itu.

“Sebagai rakyat Poland yang bertanggungjawab ke atas masa depan tanah air kita dan hak setiap orang yang tinggal di bawah kuasa kedaulatan republik kita.

“Kami menuntut tindakan subversif dihentikan serta-merta oleh kerajaan dan majoriti parlimennya terhadap hak untuk hidup, yang disahkan dalam perlembagaan kita,” ujar kata penunjuk perasaan dalam sebuah resolusi.

“Asas untuk hak yang dilindungi oleh republik kita ialah maruah manusia yang semula jadi, tidak boleh dicabut dan tidak boleh dilanggar, ia adalah perlindungan yang menentukan kewibawaan dan maruah negara.”

Deklarasi para penunjuk perasaan itu diterbitkan sempena Perarakan Nasional untuk Kehidupan pada April 14, yang dihadiri sekitar 50,000 orang di Warsaw dengan slogan “Niech



Peserta March for Life di Warsaw, Poland. Gambar: media Vatikan.

Zyje Polska!” (Hidup Poland!).

Penganjur mengatakan demonstrasi tersebut – yang dimulakan dengan Misa di dua buah katedral Katolik di ibu kota itu dan acara penyampaian degup jantung bayi yang belum lahir melalui pembesar suara.

Perarakan besar-besaran itu menghantar “isyarat yang sangat jelas untuk bertindak dan mahu kejelasan konkrit” tentang keputusan oleh dewan rendah Sejm Poland yang dikeluarkan pada April 12 lalu serta mendesak empat rang undang-undang

liberalisasi pengguguran itu dirujuk kepada suruhanjaya parlimen tergepar.

Menghormati kehidupan adalah salah satu nilai paling penting dan tugas asas setiap manusia,” kata Uskup Agung Wojda.

“Berjuta-juta di seluruh dunia melakukan usaha berterusan untuk melindungi kehidupan manusia, terutamanya yang paling tidak berdaya, yang masih dalam kandungan dan belum lahir, untuk menunjukkan kepada semua orang betapa indahnya kehidupan ini.” — *media Vatikan*

Paus mohon konflik di Timur Tengah dihentikan

VATIKAN: Pagi hari setelah Iran melancarkan ratusan drone dan peluru berpandu ke Israel, Paus Fransiskus memohon kepada negara-negara untuk menghindari peningkatan kekerasan.

“Saya dengan sepenuh hati memohon untuk menghentikan tindakan apa pun yang boleh memicu lingkaran kekerasan dengan risiko menyeret Timur Tengah ke dalam konflik yang lebih besar,” kata Bapa Suci pada April 14 telah mendaraskan Doa “Regina Coeli” bersama para pengunjung di Dataran Santo Petrus.


Menurut akhbar Israel, Haaretz, Iran melepaskan 330 drone dan peluru berpandu ke pusat keten-

teraan Israel pada April 13 dan 14.

Sri Paus Fransiskus mengatakan, “Saya mengikuti dalam doa dan dengan keprihatinan, juga kesedihan, berita yang saya dengar dalam beberapa jam terakhir ini, situasi di Israel semakin memburuk akibat campur tangan Iran.”

Tegas Sri Paus, “Semua negara harus mengambil sisi perdamaian, dan membantu Israel dan Palestine untuk hidup di dua negara, berdampingan dengan aman.”

Sekali lagi Sri Paus Fransiskus mendesak Israel dan Hamas untuk menghentikan pertempuran di Gaza “dan membuka ruang rundingan dan dialog dilakukan.” — *media Vatikan*



Iran melepaskan 330 drone dan peluru berpandu ke pusat ketenteraan Israel pada April 13-14.

AUDIENSI UMUM HARI RABU BERSAMA SRI PAUS FRANSISKUS

Bersederhana tidak merampas kebahagiaan kita

VATIKAN: “Keupayaan kita untuk menguasai diri kita dan menyederhanakan nafsu kita, dapat membawa kita ke arah kebahagiaan sejati,” kata Sri Paus Fransiskus semasa Audiensi Umum Hari Rabu, April 17 lalu.

Sri Paus Fransiskus meneruskan siri katekesisnya mengenai kejahatan dan nilai-nilai murni.

Selepas berbulan membicarakan perkara mengenai kejahatan, prelatus itu beralih kepada tema “nilai-nilai murni” di mana katekesisnya yang terdahulu telah menyentuh hal kebijaksanaan, kesabaran, keadilan, ketabahan, dan sekarang, kesederhanaan.

Sri Paus memetik refleksi Aristotle tentang *enkráteia*, istilah Yunani secara literal bermaksud “kuasa ke atas diri sendiri,” ketika ahli falsafah hebat itu mengkaji nilai-nilai murni semasa beliau meneroka konsep kebahagiaan.

Bapa Suci menjelaskan kesederhanaan difahami sebagai “kemampuan untuk menguasai diri”, “seni untuk tidak membiarkan diri dikalahkan oleh nafsu yang memberontak.”

Orang yang sederhana dapat bertindak bijak apabila berhadapan dengan keseronokan.

“Menikmati keseronokan tanpa batas boleh merugikan kita. Apabila keseronokan itu mudah didapati, kita akan cepat berasa bosan.”

“Sebagai contoh: Ramai orang yang tidak sabar untuk mencuba segala-galanya secara rakus. Apabila semuanya sudah dipenuhi, dia mulai kehilangan semangat dan bosan!”



Tetapi orang yang sederhana adalah umpama mereka yang merasai wain. Mereka terlebih dahulu mencicipi sedikit wain itu, untuk menghargai dan menikmati rasa, bukan meneguk sekaligus.

Orang yang sederhana, kata Sri Paus Fransiskus, tahu cara menimbang kata-kata dan menimbangannya dengan baik. “Dia tidak membenarkan kemarahan merosakkan hubungan kerana tahu rasa marah akan berlalu. Dia tidak membenarkan kemarahan merosakkan persahabatan kerana tahu, persahabatan sukar dijalin semula apabila salah seorang terluka.

Dalam kehidupan keluarga, kita mungkin sukar mengawal tekanan, kemarahan dan benci. Tetapi bagi orang yang sederhana,

mereka tahu bila masa untuk bercakap, bila masanya untuk berdiam diri.

Bapa Suci menyifakan orang yang sederhana sebagai berharga dan jarang berlaku.

Apabila “segala-galanya di dunia ini mendorong kita untuk berseronok secara berlebihan, gabungan murni kesederhanaan dan nilai-nilai Injil seperti merendahkan hati, menjadi ‘kecil’, bijaksana, sopan dan lemah lembut” dapat menjauhkan kita dari perangkap duniawi.

Sifat sederhana tidak menjadikan seseorang “muram dan tidak gembira,” sebaliknya, ia membolehkan kita menikmati kehidupan dengan lebih baik.” — *media Vatikan*

Homoseksual, Gereja tidak membenci kalian

Riko (bukan nama sebenar), seorang pemuda Katolik, berusia 25 tahun dan bekerja di sebuah syarikat swasta.

Melihat kepada keperibadiannya, dia kelihatan pemuda normal. Namun siapa menyangka, Riko sedang bergelut dengan kecenderungan yang ada pada dirinya.

Riko mendapati dia seorang homoseksual kerana sangat tertarik dengan pasangan sejenis berbanding lawan jenis.

Menjadi homoseksual memang bukan hal yang mudah untuk diterangkan. Pada satu sisi, homoseksual dianggap menyimpang dari kebiasaan atau hukum alam. Pada lain sisi, pelaku homoseksual sendiri merasa itulah dirinya yang sebenar.

Homoseksual dapat terjadi secara alamiah dan hormonal atau bahkan kromosomal, yang mendorong seseorang mengekspresikan ketertarikan seksualnya pada rakan sejenis.

Akan tetapi, ramai orang menggelakkan diri dari membincangkan teori ini kerana orang lebih suka melihat bahawa homoseksual adalah perkara biasa dan bagi mereka, di dunia ini, sudah wujud ramai lelaki dan wanita yang menyukai pasangan seksual sejenis.

Gereja Katolik juga memandang homoseksual sebagai realiti yang tidak dapat dinafikan.

Dokumen terbaharu, *Dignitas Infinita*, menggesa agar golongan homoseksual tidak didiskriminasi, tidak dianiaya atau dilayan dengan buruk.

Gereja tidak menutup mata akan



adanya kaum homoseksual. Gereja juga mengasihi mereka tetapi dalam hal perkahwinan antara homoseksual, tidak ada keizinan atau tidak ada kelonggaran kerana ini terang-terangan bertentangan dengan hukum alam seperti yang dicatat dalam Kejadian 2:24 atau Markus 10:7, lelaki meninggalkan ayah dan ibunya dan bersatu dengan isterinya.”

Ajaran Gereja tidak akan dapat menerima hubungan homoseksual kerana persatuan kudrati dan alkitabiah hanya menerima hubungan lelaki dan perempuan.

Ini tidak boleh dianggap Gereja membenci kaum homoseksual. Gereja memahami adanya perbezaan dalam diri seorang homoseksual dibanding orang kebanyakan.

Berbalik kepada hal Riko, kecenderungannya yang menyukai kaum sejenis barangkali adalah jalan hidupnya tetapi ini tidak bermakna, dia dibenarkan melakukan aktiviti seksual sejenis.

Setiap orang yang berkahwin juga mempunyai kecenderungan menyukai orang lain di luar pasangannya tetapi mereka tidak bebas meneruskan keterarikan itu. Jadi dalam hal ini, ia sangat berkait rapat dengan pengendalian diri.

Perasaan menyukai sesama jenis sangat berkaitan dengan pengalaman psikologi sepanjang hidup seseorang.

Mungkin pengalaman penderaan seksual atau keluarga mengasuh anak lelaki mereka seperti anak perempuan — menjadi pemicunya.

Jika anda menyukai sesama jenis, ia adalah perasaan, maka secara moral, perasaan itu tidak salah. Tetapi jangan melahirkan perasaan itu melalui tindakan. Bertenang dan jangan bertidak melulu.

Fikirkan hal-hal yang baik, buatlah relasi dengan sebanyak mungkin orang, dan pakai talenta untuk memuliakan Tuhan. Tidak semua cinta harus memiliki dan tidak semua hasrat harus dipenuhi di dunia ini.

Riko mengatakan, ketika perasaan suka terhadap pasangan sejenis itu semakin mendesaknya untuk melakukan sesuatu, dia akan ke kamar pengakuan, menyibukkan diri atau meminta bantuan pakar dan berbual kepada seseorang yang dipercayainya. — *hidupkatolik*

PENULIS BERKICAU

Literasi digital

Beberapa tahun lalu, seorang rakan saya mengirim gambar seorang paderi yang melayani di luar negara, kononnya sedang terlantar sakit dan meminta saya untuk mengesahkan berita itu.

Saya mengambil inisiatif untuk menghubungi paroki di mana paderi itu bertugas dan ternyata gambar itu tidak benar.

Namun, kesan daripada penulisan gambar itu, semua akaun media sosial dipenuhi dengan emoji “tangan berdoa” dan ucapan “semoga cepat sembuh Fr...” padahal paderi tersebut sangat sihat.

Nampaknya, kebanyakan orang melihat bahawa tindakan menularkan sesuatu merupakan hal sederhana. Mereka kurang peka bahawa apa yang mereka sebarkan itu boleh membawa kesan emosi kepada keluarga dan individu tersebut.

Ini juga memperlihatkan rendahnya proses refleksi seseorang sebelum membuat keputusan dan tanpa menyaring maklumat terlebih dahulu.

Kita juga melihat melalui media di tanah air kita dan media luar negara, mempunyai versi tentang sesuatu berita.

Contoh terdekat ialah peperangan antara Israel dan Palestine. Ada media yang berdiri di sisi Palestine, ada juga yang menyokong sisi Israel.

Masing-masing menyatakan pihak tertentu sebagai penyerang dan pihak lain sebagai korban. Dengan segala perdebatan yang hebat, tidak menghairankan ada perkara yang ditokok tambah agar berita menjadi lebih panas dan sesebuah agensi berita boleh menjadi terkenal dengan taktik sebegini.

Pemberitaan itu menciptakan gelombang pengaruh kepada manusia di pelbagai belahan dunia, sebagai warga negara atau aliran kepercayaan yang menyokong Israel atau Palestine.

Kemudian, muncul pula gerakan di media sosial yang memboikot produk-produk dari Israel. Mampukah ini menghentikan peperangan? Tidak, malah ekonomi dalam negeri akan bertambah teruk.

Saya gembira dengan usaha Gereja yang berusaha menumbuhkan literasi digital apatah lagi akses informasi berkembang dengan pesat melalui teknologi digital seperti platform internet, media sosial dan sebagainya.

Literasi digital dapat mendorong umat Gereja bukan hanya menguasai pelbagai hal yang berkaitan dengan digitalisasi untuk hidup, belajar dan bekerja, tetapi lebih bersikap sedar untuk menyelidik kebenaran dari pelbagai maklumat yang tersebar di media digital mahupun media sosial.

Latihan literasi digital di peringkat paroki bagi belia dan warga paroki adalah amat penting. Jika di peringkat paroki tidak dapat menganjurkan latihan ini, mungkin paderi paroki boleh memikirkan bekerjasama dengan paroki lain.

Bagi saya, selain seminar-seminar pemantapan iman dan hidup baru dalam roh, latihan literasi digital penting untuk mendidik warga paroki agar sentiasa berwaspada akan ancaman ‘digitalisasi’ dan menggalakkan mereka menjadi penginjil di dunia maya.

Sebagai anggota Gereja, kita adalah pewarta Khabar Sukacita. Kita tidak memproduksi berita yang menghasut untuk memperbesar kan lagi isu-isu seperti stokin, kasut dan mungkin tidak lama lagi berlarutan kepada alat-alat kelengkapan peribadi yang lain!

Sebagai orang Katolik, jangan lupa kisah bagaimana Hawa dan Adam jatuh ke dalam dosa kerana pujukan licik sang ular (Kej 3: 1-24).

Ingat, ular menyebarkan berita palsu yang berhasil memprovokasi mereka sehingga memakan buah terlarang. Berita palsu atau *hoax*, tipu muslihat ataupun provokasi bukanlah hal baharu.

Oleh itu, sentiasalah memeriksa kebenaran dan semoga kita menjadi pewarta Berita Baik yang sejati melalui tindakan sehari-hari mahupun di media digital.

Pembaptisan: Pintu gerbang menuju kehidupan ilahi

SANDAKAN: “Kebangkitan Kristus adalah peneguhan dan pengesahan konkrit kepada kemenangan yang mengalahkan kematian serta membawa kehidupan baharu,” kata Uskup Julius Dusin Gitom pada malam Paskah, Mac 30 di mana prelatus itu membaptis 42 katekumen di Katedral St Mary.

Kepada para baprisman baharu, prelatus itu mengingatkan mereka bahawa pembaptisan bukan sekadar tindakan rasmi atau upacara penerimaan ke dalam Gereja, tetapi pembaptisan merupakan permulaan perjalanan

iman, bersatu dengan Kristus.

“Ritus Pembaptisan,” kata Uskup Julius, “melambangkan penyucian rohani, kelahiran semula, menandakan kematian dan kebangkitan kita bersama Yesus.”

Dalam homilinya juga, Uskup Julius menegaskan bahawa wanita bukanlah saksi yang dipercayai pada zaman Yesus, tetapi Yesus telah memberi keistimewaan kepada wanita dalamewartakan kebangkitan Kristus.

Yesus membawa perubahan sosial yang besar dalam masyarakat pada zamannya dan salah satu-

nya ialah meneguhkan martabat wanita.

Di sisi Tuhan, semua lelaki dan perempuan adalah anak-anak Tuhan. Tuhan menghendaki kita memenuhi tanggungjawab kita untuk berkongsi Khabar Sukacita dengan orang lain serta berkongsi kehidupan Paskah dengan keluarga sekaligus komuniti dalam perjalanan bersama sebagai Gereja sinodal.

Selepas homili, Uskup Julius mengetuai ritus pembaptisan kepada 40 orang katekumen dari kelas Bahasa Malaysia dan dua orang dari kelas Bahasa Inggeris.



Baptisan baharu memasuki Katedral St Mary dengan memakai pakaian putih dan memegang lilin bernyala.

Pesta Kerahiman Ilahi di Sg Ara cipta suasana doa dan harmoni

PULAU PINANG: Perarakan Kerahiman Ilahi pada April 7, sejauh 2.65km bukan sahaja disertai oleh para devosan Kerahiman Ilahi tetapi juga disaksikan oleh masyarakat di sekitar Sg Ara, Pulau Pinang.

Dengan tema “Tiket: Amanah dan Doa. Destinasi: Kasih dan Belas Kasihan”, Pesta Kerahiman Ilahi di Gereja Kerahiman Ilahi (CDM) memulakan persiapan dengan novena pada hari Jumaat Agung hingga ke hari perayaan, bagi membimbing umat beriman mengalami kasih Yesus yang tidak terbatas.

Pas tiket diedarkan sebelum minggu perayaan dan dicop setiap hari semasa perayaan, memupuk penglibatan di kalangan umat serta mendorong umat dari jauh dan dekat menyelami lebih dalam kebaktian Kerahiman Ilahi.

Perayaan yang dianjurkan dengan teliti itu adalah di bawah bimbingan paderi paroki CDM, Fr Michael Raymond, OFM Cap.

Selama seminggu, Misa harian dan Misa Kudus pada hari perayaan turut dipimpin oleh beberapa orang paderi iaitu Fr Fabian Dicom dari Katedral Roh Kudus dan Fr Esmond Chua, OFM, dari Gereja Kristus.

Penziarah dari Masai, Johor, dan Ipoh, Perak, turut hadir menyertai umat dari pe-



bagai latar belakang dalam pelbagai aktiviti misalnya menonton filem pendek untuk kanak-kanak dan dewasa, pertandingan warna keluarga, sesi gerai foto, permainan dengan pelbagai hadiah dan minuman harian.

Kemuncak perayaan ialah penghormatan terhadap relik, benediktus dan perarakan lebih dua kilometer sambil mendaraskan kaplet Kerahiman Ilahi dalam empat bahasa.



Umat mengambil giliran dalam membawa imej Kerahiman Ilahi manakala Fr Michael dan Fr Desmond Jansen, secara bergilir membawa Ekaristi Kudus dalam perarakan tersebut.

Fr Michael menyatakan kegembiraan melihat paroki itu meriah dengan kehadiran penziarah dan umat paroki.

“Marilah kita sentiasa mencari wajah Tu-

han dan semoga perayaan Kerahiman Ilahi memberi kita berkat mendekatkan diri kepada Tuhan, mendapat kedamaian bersama-Nya dan satu sama lain.

“Kepada semua penziarah yang menyampaikan permohonan dan doa, percayalah bahawa Tuhan kita yang pengasih akan sentiasa mengabulkan permintaan kita!” kata Fr Michael.

Buku panduan kerohanian untuk keluarga: Untuk diriku dan Rumahku

KUALA LUMPUR: Pejabat Kateketikal Kebangsaan, dengan kerjasama Komisi Kateketikal Malaysia dan Konferensi para Uskup Katolik Malaysia, dengan sukacitanya mengumumkan penerbitan “Untuk Diriku dan Rumahku” (*As For Me & My House*) iaitu katekesis khusus bagi keluarga Katolik dan untuk diri sendiri yang membantu kita menemui Kristus.

Buku ini memberi panduan memulakan hubungan transformatif dengan keluarga dan bagaimana memperdalam kerohanian kita.

la juga menawarkan pandangan berharga dan sarana praktikal untuk memperkayakan

iman keluarga kita serta mewujudkan warisan pertumbuhan rohani yang berkekalan.

Sama ada anda mempunyai bayi, kanak-kanak atau remaja, buku ini menawarkan aktiviti kateketikal yang sesuai, renungan dan perbincangan yang bermakna yang akan mengukuhkan ikatan keluarga anda, dan membantu anda menyepadukan iman dengan kehidupan keluarga.

Dalam buku ini, anda akan meneroka tema seperti memeriksa kembali peranan anda sebagai saksi Tuhan di rumah anda, memahami kepentingan pendidikan iman dalam keluarga anda, mengenal pasti pelajaran

kecil untuk kerohanian yang lebih berkesan dan mendapat inspirasi dari kisah pengalaman orang lain.

Buku ini dapat diperolehi dalam Bahasa Malaysia, Cina, Inggeris, Iban dan Tamil.

Difahamkan, buku ini masih dalam proses penghantaran (ketika artikel ini ditulis) ke paroki-paroki di Malaysia Timur.

Sila sentiasa berhubung dengan Komisi Kateketikal Keuskupan dan Komiti Kateketikal di paroki masing-masing yang juga akan memberi maklumat bagaimana memperoleh buku panduan “Untuk Diriku dan Rumahku.”

